

四庫全書

集部

欽定四庫全書

昌谷集卷三

宋 曹彥約 撰

七言律詩

送趙侍郎被召

大纛高牙古帥垣，甘泉人物帝王孫。  
文如賀白尤寒素，政似龔黃更本原。  
歲課未書先報政，詔封頻趣定調元。  
欲知惠愛今多少，水滿長川月滿村。

祇為分憂輟近臣，不應持久費經綸。  
暫來制閫無多日，

歸去朝天及早春紅旆綠油生羽翼落霞秋水動精神  
行行但說長安近辜負攀留幾許人

憶昨東來護印章又從此去餞朝裝辛勤行李知身老  
幸會依蓮到骨香五十功名猶落寞百千懷抱轉荒唐  
而今親見為霖雨野草幽花特地芳

薛侍郎移鎮合肥被命入覲賦唐律詩二章

經濟蜚聲數十年只今韞櫝固依然老於思慮惟憂國  
好在功名更守邊人望鼎來須易地春風早去便朝天

漢家老將輝千古只有留屯服罕开

平生惟仰薛居州病渴尋梅正所求風送有時參畫鷁  
幕開無路到青油百年萬事常交臂一代數人今白頭  
帷幄得賢如此好貂蟬元不在兜鍪

送胡侔辟書不遂復到選部

便飽蒲帆縱木蘭王陽時節好彈冠官身臺歷星遲速  
世路天香篆屈盤人去邊頭三策在春回天上五谿寒  
歸飛未戢青冥翅却與朝廷作羽翰

禱雨陽山

暮投突兀淨為坊  
早踏崎嶇翠作岡  
露氣失涼風帶暑  
嵐陰欺曉日韜光  
不憂時事禽空語  
可怪凶年草更芳  
欲問行人祈禱意  
日來鉦鼓漸淒涼

所以登山不憚煩  
為藏雲氣達泉源  
多峯豈炫千巖秀  
一綫纔通萬壑奔  
其在茲乎須出岫  
此時何不早翻盆  
名高已到巖瞻地  
只有為霖可養尊

課花木

旋飾芳菲真草萊強加湔祓敵塵埃春將紫翠籠丹桂  
晚覺蒼黃植綠槐鼻觀已通蜂蝶鬧酒盃頻到燕鶯猜  
官居未勝閒居樂乞得三年野興來

序齋丁主簿挽章

詩禮彬彬到古風月橋人物序齋中鄭公宅畔鄉仍在  
馬氏臺前帳已空萬事可堪評夜旦九泉終不蓋英雄  
只今家學方如此猶喜先生易未東

一碧萬頃堂

乞得湖光萬頃多，傍招九疊更嵯峨。  
百年未死須閒在，一日不來如景何。  
意遠已知貪雪月，身安猶欲鎮風波。  
只愁頑似雲間石，更有何人為琢磨。

寶泰寺讀曾鴻父侍郎留題有感次韻作侍郎  
挽歌

斯人千古閼音塵，絕妙肝腸好受辛。  
四袞升沉懸日月，百年修短誤君親。  
天邊尚記絲綸手，地上今無磊砢人。  
對此感懷非為此，贖之空擬百其身。

陪總鄉戎帥登高因至郊外

萬木陰陰覆女蘿一川佳處寶峯多  
因晴領客催萸菊  
恐雨妨農訪麥禾  
付我江山須領畧  
可人時節易蹉跎  
心閒更了官中事  
未必秋風奈老何

海棠

彼美花兮宜晚春  
柔姿淑艷是何人  
十分國色粧須淡  
數點臙脂畫未勻  
帶雨容開渾是恨  
出牆頭望恰如真  
幾時謫下蓬萊島  
霞染仙衣痕尚新



一度相逢一度春不知名姓是何人十分國色粧須淡  
數點顰脂畫未勻好把東皇為上客便堪宋玉作西鄰  
臨邛道士今何在說與唐宗是太真

九江郡齋分韻送魏六兄好文遊鄂渚得陽字  
倦客尋閒誤入忙飄然上水擊潯陽鈴齋有伴期三友  
玉德何人似六郎千里江山時聚散滿城風月夜淒涼  
西風隱作中秋會莫戀南樓醉武昌

送蓬丘山人張以道歸吉州

山人曾著宰官衫了事還為馬口銜別我三年無瞬息  
思君一節尚巉巖人生契合常如此吾道年來見大凡  
雨後只愁風力健江空無計歎歸帆

代送禮部楊侍郎帥江陵

鼎鼎真才筆橐聲清朝人物獨先生從來馬老荊州望  
可但元公禮部名謀帥直須醫國手輟賢何以慰人情  
送春又數春回處忍更堂堂背我行

慈恩一集成三紀朝路相從不半年託蔭身如松下草

願交身已社中蓮  
一時事體公輕重  
到處參辰我後先  
折贈不須門上柳  
病懷落寞正如綿

奕碁戲作

人皆託物滌塵襟  
我亦於碁了寸陰  
散誕不知身老大  
從容聊與世浮沉  
諸君誤作機關說  
老子初無勝負心  
收拾定應全局在  
清風明月照書林

次韻長沙鄭監廟公選

先生清德徹寒泉  
應俗周旋更折旋  
游宦向來徒溷耳

盛名今得執多馬詩嚴尚作蜂腰格志大寧憂馬腹鞭  
却似周公勤小物亂揮珠玉擲忘年

已廢詩壇罷酒兵更無餘力敵分陰兩章句好驚霏屑  
千里神交信斷金如奕棊然隨手著效顰眉亦撚鬚吟  
不圖病客甘投老敢與詩人作賞音

喜晴

捷書遲報已驚神不分龍公巧障人傾倒從頭慳  
雨破除當面艷陽春有園未賞陰連屋無地言歸水拍津

報道纖埃歸洞壑本來山色任橫陳

喜晴

醉入機緘喜不勝幾多風雨一番晴掃除氛祲乾坤大  
拂拭光輝日月明萬計官逋紆吏責十分燈夕看人情  
熙熙不但春臺樂從此東南說建平

春雪初霽

已通消息變垂楊又忍須臾困海棠雪意踈時風自惡  
雲根好處日爭光威嚴冷到漢三輔艷冶春歸唐六郎

四者欲并從古少便將樽酒問羣芳

雨中同官遊野園

忙了三年乍得閒便乘風雨看溪山可憐過眼事多少  
都不關心春往還老至但驚霜上鬢興來聊復酒開顏  
如今便作遊人喚更欲徜徉紫翠間

諸丈和野園之詩乃復次韻

驤首彌年閑六闕倦飛今日徧千山也知心醉非從事  
頻覺身輕有大還酒債人生頻檢點官情山色正孱顏

不須作惡悲兒女更放羈人到席間

陪李監稅飲劉園

剩栽花木闌低墻滿刻詩文榜畫堂  
郁李齊開枝尚弱牡丹垂謝藥猶香  
書生野趣人間少遊子佳時客裏忙  
準擬燈前兒女問得君全不負春光

重陽湖莊無菊走筆招趙季清黃一之登高

搖落江村菊就荒苦無節物報重陽  
病來欲廢傳盃舊老去唯思著帽強  
已變楓丹秋盡力僅存萸紫晚添香

登高有景那能賦  
喚取騷人趙與黃

次韻黃一之

蕪盡田園學亦荒  
衰年無復夢張陽  
起予節裏心期合  
及此年時脚力強  
萬古推遷陵谷變  
幾人登覽姓名香  
欲追奔逸慚駑蹇  
始信人間有乘黃

九日遣興

散誕平生百不憂  
未應搖落學悲秋  
儻來節物知寒暖  
泛應賓朋任去留  
落帽粗豪非宿好  
插花姿媚怯英游



不如只把茱萸看免歎尊前歲月流

次韻隆慶楊使君送別之章

傾蓋星橋憶去年官聯預說使君賢  
別來風送空中月此去雲開劍裏天  
治效龔黃方側耳交情嵇呂好差肩  
相逢便作陽關曲數日銷魂正黯然

細讀君詩字字新巧將鹽豉入羹莼  
也知世路催行客更遣工歌勞使臣  
千里身心空晤對五經懷抱想紛綸  
他年宛水昭亭外把玩猶能絕點塵

春同伯中之櫟田

泣卜他年正首丘尚乘風日逐英游平分正月春猶淺  
斷送元宵冷未休藕斷山鍾黃蘗外枝分水轉石榴頭  
卷簾隱几俱為樂付與涪翁悶得不

東菴新闢雲棧

步出東門輦不航以雲名棧正相當地臨空濶天成險  
水到回旋石作梁萬頃波濤一丘壑百年官吏幾循良  
古來勿翦甘棠意此地風流未可量

送趙安卿召除考功

秉節歸來乍賜環，握蘭高處自催班。  
身趨地禁嚴凝上，名在湘清欸乃間。  
萬竈艱難寬國步，一星咫尺近天顏。  
席前若問長沙事，只有深仁滲百蠻。

五老重湖一腐儒，強令隨牒應時須。  
杜陵身世霜前鬢，陶令田園雨後蕪。  
梅菊滿懷憂歲晚，松楸闕念怯春濡。  
知音自是調元手，乞與還山護命符。

次知縣花名詩韻

天不長春又入冬可能含笑拒霜風  
凌霄器宇隨時見茉莉生涯到處窮  
但可憐花成後約莫將荳蔻掩前功  
人生且進薔薇露滴滴金錢總是空

晚登縣陴

樓櫓寬閒事力勞新來人物舊蓬蒿  
占留古意梅根老壓斷寒聲桺木高  
地迴山川含鼓角夜明星斗助弓刀  
當時愛得蓮無恙一段清流繞屋敖

廖子晦以通書及龜山道鄉晦庵帖見惠

文公垂憲墨淋浪鼎立龜山更道鄉家有一焉猶冠絕  
寶茲三者見珍藏來從疊嶂層巒裏置在光風霽月傍  
收拾兵戎無一物滿船空載有歸裝

雨行宿高岡人家戲成口號

過了一坡更一坡中間田道水成渦雨來更驟擔肩重  
泥滑不休行步多奈老杉松猶偃蹇趨時桃李暫蹉跎  
炊煙戀屋不肯出夜宿人家燒薜蘿

靜坐對茶花偶作

菊後梅前冷落時  
剪檀雕蠟酪為肌  
人從老處親平淡  
花向無中補闕虧  
地暖不憂春近遠  
牕空惟映月參差  
病夫久廢盧仝椀  
鼻觀從容聖得知

次韻晦父喜雨詩

何處鳴鳩只好音  
誰家孝婦有冤心  
古來禋祀關仍叔  
今日兵饑憶華歆  
王制不堪乖用飭  
春秋從此却書霖  
君詩好似靈湫水  
清絕無人測淺深

同官約賦紅梅成五十六字

淡中著色似狂顛心與梅同迹不然奪我馬支寧免俗  
豈無膏沐獨爭先辨桃認杏何人拙壓雪欺霜政自妍  
只恐東君招不得好修猶在竹籬邊

落星寺詩

好風好雨舊關情落在江心不强名地盡匡廬猶變現  
水連彭蠡畧崢嶸金山但設魚龍險灩澦空聞象馬驚  
爭似清暉樓上好重湖九疊互分明

送子通司法之官括蒼

議禮蠲租兩有聲老坡元不計身榮為民受屈今誰似  
有子能傳近得名此去掾曹無暖席是中科律定持衡  
公餘更欲翻經籍古道時才孰重輕

答趙守見貽之韻

已報新題下紫泥尚留佳識築新隄一心國事忉忉在  
萬口民歌剪剪齊惜去轍須田父卧催歸詔有內臣齎  
舍人若問朝天日割盡黃雲水滿犁

送趙戶侍出守鎮江



都人車馬鬧城闐似惜民曹更牧民到處忠勤無粉飾  
入朝言語有經綸只今次輔須賢帥自古維城必懿親  
報政不須三五月姓名端的記嚴宸

和三十郎蠟梅韻

官黃新賜極恩榮花不同梅與共名頗謂寒中宜作伴  
想因開早更為兄世間何物疑真蠟海上新來染碎瓊  
體得自香天分好金塗銅砌却崢嶸

久雨歎

誰為戎首起邊功萬里生靈一擲中天為憂之連作雨  
人無識者驟歌風所期闕地今城守不善因糧却火攻  
古道君師意深遠改絃端的奏膚公

秋分後十日得暴雨

負固驕陽不忍回執迷涼意誤驚猜傾盆雨勢疑飛瀑  
揭地風聲敵迅雷堦下決明添意氣庭前甘菊賸胚胎  
可憐歲事今如此麥壠蔬畦尚可培

豫章賀丁漕建臺宴口號

車馬盈門撥不開  
絲衣新著繡衣來  
壯懷風月歸英蕩  
滿意江山入酒盃  
便覺陽和通嶰竹  
已知春信到官梅  
西江豈是留人處  
築得沙堤喚得回

晚梅

去年浮月動微薰  
隕籜憂寒正襟羣  
今日得春張萬玉  
采繁迎煖尚從軍  
花時十月連正月  
歲事三分占一分  
酒煮和羹還好  
在預除蕪穢莫紛紛

湖莊謝客

漸撤疎籬短作垣與春期約老田園晴多易得花開早  
地迴難藏鳥語喧我欲偷安頻謝客人誰見許數敲門  
定知桃李平生誤下已成蹊漫不言

朔日迎客之章諸賢多有和者使君再賦仍次  
韻以謝

霜清石出水分流邂逅騷人得志秋落日斷霞增逸氣  
小牕低戶魏英游苦無酒量能陪飲只有詩盟可避愁  
此地何哉添此瑞建章新識九牙驕

五言絕句

飄飄臺

清風怒折腰，斷送斜川歸。吾今已歸了，無用頻吹衣。

經丘臺

尋壑初不憚，經丘亦忘疲。人見崎嶇處，不知心坦夷。

七言絕句

祁門道中即事

識面山川尚可尋，跳丸日月更相侵。語音改道家山近。

行色不知春事深

社雨初晴舊燕歸  
春膏潛動小鮮肥  
桃花未必隨人去  
飛向行人行處飛

餅餌商量全孕麥  
衣裳消息半芽桑  
山堂草色夢魂遠  
官路柳絲心緒長

為愛幽鄉度遠村  
支頤竚立愛山礬  
栗留尚惜輕求友  
反舌紛紛亦巧言

修竹圍牆草護堦  
賞花庭院已安排  
洛陽忠孝家何在

不貢姚黃更緬懷

嶂疊巒層巧送青一溪幽處小園亭誰能換得王維手  
洗我塵埃作畫屏

絃誦琅琅兩岸聞此風尤足張吾軍兒童相顧驚相問  
莫是當年舊主人

山木陰陰繫晚牛水田漠漠任春鷗長歌大笑却歸去  
長在農家今白頭

半淪溪谷半山岡地狹民多盡蓋藏爭道去年小豐稔

至今祖米正輸王

古來遺逸野人家石磴崎嶇閣道斜犬吠人行都不問  
杉籬空掩刺桐花

夜坐

道人心事畧幽閒落在星流羽檄間吏退燈明書到眼  
袖爐烘煖鷓鴣斑

偶成

曩疑先賢嗇于言何不明明細細傳今省從前都錯認



更加詳後即紛然

夫子文章不用為從心到口沒參差咄哉韓子休汙我  
却道詩葩與易奇

雪月風花總不知雕奇鏤巧學支離四時多少閒光景  
無箇閒人領畧伊

勿學唐人李杜癡作詩須作古人詩世傳李杜文章伯  
問著關雎恐不知

詩癡正自不煩攻只為英才輒墮中今日已成風俗後

後生箇箇入樊籠

儒風一變至于道此是堯夫未識儒除却儒風如更有  
將驢騎了復尋驢

當敬不敬謂之悖當正不正謂之詖是中適莫俱難著  
意態微生已覺疏

桃紅柳綠簇春華燕語鶯啼盡日嘉誰信聲聲沂水詠  
又知處處杏壇家

可惜有生都衮衮如何終日只紛紛滿前妙景無人識

到處清音獨我聞

我吟詩處鶯啼處我起行時蝶舞時  
踏著此機何所似  
陶然如醉又如癡

此道元來即是心  
人人拋却去求深  
不知求却翻成外  
若是吾心底用尋

誰省吾心即是仁  
荷他先哲為人深  
分明說了猶疑在  
更問如何是本心

若問如何是此心  
能思能索又能尋  
汝心底用他人說

只是尋常用底心

此心用處沒蹤由擬待思量是討愁但只事親兼事長  
只如此去莫回頭

可笑禪流錯用心或思或罷兩追尋窮年費煞精神後  
陷入泥塗輾轉深

心裏虛明象太空乾坤日月總包籠從來箇片閒田地  
難定西南與北東

莫將愛敬復雕鏤一片真純得自全待得將心去鉤索

旋栽荆棘向芝田

忽認胸中一團氣一團氣裏空無地既空無地更何義  
此無廣狹無一二

惡習起時能自訟誰知此是天然勇多少禪流妄詆訶  
不知此勇元不動

回心三月不違仁已後元曾小失真一片雲花輕著水  
冥冥不復省滴醇

有心切勿去鈎玄鈎得玄來在外邊何似罷休依本分

孝慈忠信乃天然

伯量同二弟欲見訪湖莊以詩告至褒拂過情

輒次其韻

清江一曲界間闕倚作琴聲上下灘

原註琴曲清江引  
有上灘下灘聲

鵲報主人知有喜惠然金玉總稱難

笑殺商山綺與園幾年頓使護風寒只今勲業纔如此  
孤負哀顏鏡裏看

年來奪錦馬羣空而况君家有八龍傳與鄉人經濟策

問焉何惜少春容

水僊

盈盈蝶粉襯蜂黃  
水國仙人內樣粧  
同在寒梅應媿死  
枯枝猶說傲冰霜

韓耕道次八絕句韻見寄因和荅之

立說招攜與殪戎  
兩端蠻觸互論功  
古來帝力通南北  
山過焉支嶺度葱

逢危無策媿時才  
懷抱何曾得好開  
衮衮捷書來不斷

活人基本要深培

羽檄交馳駭電奔  
詔書頻下想天恩  
舊時懶惰如魔去  
祇有書生習尚存

營壘家家說望夫  
將軍志遠在余吾  
從來萬甲千金費  
曾有因糧事也無

我句拙於貧女粧  
尊前替戾敢承當  
何人錯比羅敷豔  
枉賦詩人陌上桑

特特新詩滿意來  
中間華藻任鋪排  
不知養拙干戈裏



但覺愁端變好懷

孤負靈著續短蓬  
寵光枯枿附春藪  
他年賈至岑參句  
得入詩編託杜公

昌黎世有簡編孫  
鄴下常傳慷慨言  
憶得此公端的健  
但將忠力復名門

湖莊雜詩

雨後人家菜麥香  
旋渦流水亂橫塘  
青春未有闌珊意  
付與游人自此忙

家家有分閒桃李歲歲相親舊燕鶯老子今年風味惡  
稻針麻甲尚關情

橫舟弟相別年餘阻一江之水彼此皆病未有  
可會之日向得一兩詩多悼亡感慨不忍和答  
今乃粲然盈冊老眼增明適茲喜雨取登樓喜  
雨之作先次韻三章不能多也

好詩好雨適相逢抖盡襟懷要折衝自古天人無間斷  
寧因水旱輟良農

阻饑傳播骨先寒  
愁把臺評子細看  
賴有重霄三日雨  
向來枯涸已瀰漫

我有鵠原或尼之一江橫絕謾漣漪  
幸哉未隔池塘夢  
鼎鑪初嘗豹一窺

三絕句賦和靖梅

落在西湖有歲年  
不因和靖獨爭妍  
誰知道盡香和影  
萬古新詩不在編

人如和靖清難比  
花似寒梅秀可餐  
却問荔支何所似

江瑤初雪水晶盤

觀時芬芳也自奇漢壺貯水最相宜只應卧我明牕下  
不似湖邊縱鶴時

毛希元提幹有廬山癖既卜築居之又作卧龍  
樓與玉京道院一時諸老皆為賦詩矣知賤子  
非所長而亦令賦何也作三絕句資一笑

錦繡裁成九疊山山山佳處水縈環無心但有雲來往  
看得高人取次閒

卧龍消息合為霖別派先通一綫心若向祁山聽響震  
定知梁父不須吟

玉京仙境發山謠未把芙蓉意已消此處尚堪詩興在

當年行樂亦云聊

原註太白之言九疊總廬山之名耳  
今人專指山中數培塿以名九疊不

合古意希元經始卧龍得一綫之泉于石間冬夏不竭  
玉京以山得名希元意不為永業以道院目之其山一  
名玉京一名上京淵明所謂疇昔家上京太白手把芙  
蓉朝玉京皆是山也庚辰十月乙酉書于湖莊所性堂

### 望廬山

暮年秋色戀江鄉酒熟魚肥蟹著黃已見廬山非入夢

一帆風穩稱歸航

游惠山觀第二泉

僧人顏似松杉老齋飯味知泉石多我不能茶有風冷  
愛山成癖欠消磨

自逢陸老問君名又見蘇公記此行從此却歸廬阜去  
豈無聲寄谷簾兄

蜀海棠

西蜀佳人巧欲言紅酣猶帶醉時魂子規叫斷黃昏後

却憶鄉情染露痕

餘干史子固本知縣趨朝便舟見訪以四絕句

叙舊次其韻

再拜新篇極主臣詠真何必更尋真  
論心十八年前事詩律交情更可人

虎榜初傳淡墨名饒山何重泰山輕  
日邊未得春風力江右惟高月旦評

仕已都無喜愠三有弦不解但操南  
歸來穩上論思直

政爾民情已熟諳

豈無魚鴈懶傳書  
枯枿春風不用嘘  
只有簡編遮眼在  
馬牛猶得遠襟裾

迎春花

錦作薰籠越樣新  
迎春猶及送還春  
花時色與香如此  
花後娟娟更可人

睡入華胥日未曛  
博山何在寶香聞  
覺來但有南牕靜  
葉瘦花肥醉錦薰



奉陪黃帥機訪問元夕戰場歸塗見人家園池  
花木相與歎息既帥機書前所作八詩示滕審  
言不及予也枕上不能記韻倣唐人和詩體自  
賦八絕句因以寓意

照人精采駐元戎與我驅馳錄近功想見玉簫聲遶夜  
亂芟篁竹剡春蔥

新來鉢鉞授當才嶽下浮雲日日開易得成功難更好  
鼎和諸將熟栽培

謾捐詹耳非長策便戮先零亦少恩  
整了六師須禁暴  
本朝元氣要長存

深居處女靜無粧脫兔飛時勢莫當  
已捷不須三舍避  
便將戰處入耕桑

原註聞許統領獲捷欲退師安仁

爭先報國恥非夫  
過後論功失故吾  
志士斗量賢士少  
赤松遊處智名無

並轡遊人任往來  
透牆春色已安排  
花時却記梅前事  
秀水如何不永懷

憂世愁腸轉斷蓬  
趨時好色上芳藪  
古來只有春平直  
披拂年來也不公

為渠著姓黃山谷  
結友齊名杜審言  
領畧殘膏沾句我  
彊書酬唱入坡門

催花

催花徑裏日千回  
祇恐催開落又催  
老性只宜風雨後  
綠陰青子歟相陪

道傍得熟人家

舊雨留煙飾短垣  
淺沙催水撼衡門  
旗帘動眼新迎客  
襪絰關心故弄孫

縣郭新居人家

苟簡誅茅勝野盤  
託身城郭愛平安  
五更人語驚雞犬  
壁漏簷踈共一寒

荷花

寫遍堦頭萬葉紅  
不成無味只書空  
絳綃剝盡紅酥凸  
給與煩襟作冷風

漢陰縣驛有連理山茶舊嘗遠送上官擾及百姓根條槎牙鄰於戕賊乾道初有使者沮其事今婆娑蔚蔚為一邑壯觀因見何令壁間所書

賦二十八字

逞艷呈祥祇自殲何人攫取更趨炎只將勿剪看君子  
愛物安民處已廉

謝朱鶴臯招飲四詩


過雨桃花墜晚紅及時庭草翠翻風倚牕細究天人理

六籍元無一字空

東皇無意染青紅  
長養猶資五日風  
收拾英華入新句  
祥雲藹藹媚春空

石火能留幾許紅  
人生南北馬牛風  
春光倒指無多日  
相遇休辭酒盞空

六年奔走汗顏紅  
此日行吟兩袖風  
俗慮湔磨有詩冊  
淨看明月照長空



欽定四庫全書

集部

昌谷集卷四

五

詳校官庶吉士臣吳 烜

主事臣呂雲棟覆勘

謄錄監生臣單可彥

謄錄貢生臣章松雲



欽定四庫全書

昌谷集卷四

宋 曹彥約 撰

表

代荆帥彭侍郎冬至賀皇帝表

天生民而立君中全剛德雷在地而為復運際初元必有聰明不世之資體此出入朋來之象恭惟皇帝陛下統接千歲道謹三微時敏厥修成日就月將之學不遠而復立外陰內陽之基嘉迎長至之辰永底無疆之慶

臣迹拘守土心切望雲去歲茲辰陪百辟趨班之盛太平今日想三宮上壽之儀

冬至賀太上皇帝表

三統迭推黃鍾應律一陽來復太極分爻時當亞歲之儀光啟後天之算恭惟太上皇帝陛下功成不宰道妙難名昔離照之中天羣陰屏迹今震雷之出地萬國歸誠適茲宮線之添知有玉盃之奉臣夙叨隆眷阻守遐方考史官望氣之占必書雲物相王者尊親之至復見

天心

皇帝即位賀太上皇帝表

禹績既成希夷玩物周年方永付託得人三四聖之相  
傳億萬年而一遇恭惟太上皇帝陛下聖明生稟歷數  
親傳逸樂憂勤大矣垂裳之化崇高富貴居然脫屣之  
輕遂令神器之傳可久中興之運臣適將隆指親見榮  
懷竹簡屢書竊謂本朝之盛石崖可勒願賡天保之歌

賀皇帝即位表

乾坤清夷祥開大業風雨感會運際真人鞏固宗祊光  
輝圖牒恭惟皇帝陛下道參高厚天稟元良雞鳴問安  
久仰百王之冠龍飛在位一新萬物之觀越北燕南鳶  
飛魚躍臣心馳魏闕使領熊湘王言大哉方讀丁寧之  
詔聖主決矣已占熙洽之辰

賀皇帝登寶位表

伏奉赦書皇帝陛下虔膺顧命紹履慶基如日之升克  
明克類際天所覆悉主悉臣恭惟皇帝陛下睿智生

知光明真積乾潛未躍風雷韜歌舞之聲離麗既亨日  
月顯照臨之象負宸而山嶽震疊主祭而天人統和混  
同冠帶之區率服韞裘之俗臣及茲末路親見盛時讀  
建武詔書雖一見而已決頌慶歷聖德當萬年而無窮  
賀皇太后垂簾聽政表

母儀萬國禮極尊榮子惠兆民治兼內外希濶本朝之  
典發輝載籍之傳臣伏以仁祖初年保護實專于章獻  
哲宗新政維持允賴于宣仁導末命于憑几之時共幾

務于代天之始周任如賔無前比漢馬鄧莫有成功惟  
我累朝示儀萬世恭惟皇太后陛下德高儷聖志務進  
賢密贊先猷盡柔順利貞之美志存風化無險詖私謁  
之心宜位正于簾帷以奠安于海宇臣職聯待對身阻  
祝釐景在淹滋復見祖宗之盛體關夷夏卜知家國之  
安

除直秘閣知漳州謝表

悉數外庸莫高閭寄又加中秘斷自宸衷仍兼芻粟之

官不改封圻之舊事無掣肘感極銘心伏念臣少也執  
經長而筮仕專門泥古從墨守於官箴常調進身故夷  
行於民事蜩欲飛而不至鼠有技而易窮靖言旒冕之  
深知或是廟堂之過聽率貔貅而乘障何有威名集鴻  
鴈以登車初無風采展轉受將輸之寄因循瘵調度之  
常孰移羣玉之仙來畀十連之帥平生俗骨夢不到於  
蓬山日近中權任每隆於荷橐豈半世泥塗之久曾一  
時朝蹟之無驟入選掄極新觀聽茲蓋伏遇皇帝陛下

艱難憂世忠恕用人乾轉坤旋得天地不言之美春生  
秋殺皆祖宗從欲之仁七旬立俟於格苗八命方嚴於  
作牧鼎來責重猥及人微臣敢不居安思危以榮為懼  
復鑿井耕田之業保護黎元戒要功生事之心丁寧諸  
將至若猩鼯之假息坐令貔虎之懷安敢輕徇於浮言  
更審觀於事力時乎未至容少緩於先零機或可乘終  
必擒於元濟

皇太后冊寶禮成賀皇帝表



儷極鴻名鋪張寶冊告庭大號聳動綿區不知感會之  
何如但覺驩虞之自若恭惟皇太后陛下母儀中正內  
治彰明贊大議於頃刻之間導顧命於危疑之際莫名  
造化與天比隆宜有尊榮佑宋無極恭惟皇帝陛下親  
承慈訓悉踵舊規鏤玉為文聳一時之觀聽垂衣共治  
保億載之丕平臣遠在山林式聞典禮讀建武詔幸生  
聖主之時考思齊詩益見文王之聖

冊寶禮成賀皇太后表

郵傳初播已極尊榮冊命既成益新觀聽造端內治改  
觀外朝臣竊以易著坤柔同稱於地道禮存陰教元定於  
母儀若乃祐聖治於歷年推仁心於新政本朝獨盛前  
古未聞恭惟皇太后陛下德厚承天功高與子進賢更  
化權綱夙贊於先皇憑几導言保佑尤勤於嗣聖已定  
宅宗之位亟彰鏤玉之文邁古今之上儀接祖宗之舊  
制臣叨聯扈從阻奉祠官尚與遠人被江漢人倫之化  
幸生今日見國家母道之尊

賀皇帝立后表

誕敷大號表正柔儀風化所原聳動海宇典禮之盛超軼古今臣伏以天地並眎而萬物成日月齊明而四時運惟帝德欲光於下土在坤元當正於中闡若稽文物之朝必定禕褕之位恭惟皇帝陛下務思治國必本齊家上奉崇闡承歡顏於長樂近遵祖烈發顯冊於淳熙臣世受隆恩親聞慶事職修連帥莫陪百辟之班志慕封人更上多男之祝

立皇后賀太皇太后表

三朝壽母垂訓重闡一代宸儀造端六禮神民協望龜  
筮告祥臣伏以裕陵之建中宮實由慈聖元祐之聽內  
職蓋本宣仁既已詒厥孫謀用能繩其祖武於皇我宋  
卓冠前朝恭惟太皇太后殿下德協舜華徽音周雅謂  
衣裳之治先正人倫欲江漢之風並行王化定名椒掖  
增重蘿圖臣假守藩方阻陪班賀但想鵷鸞之列不勝  
螻蟻之情

瑞慶節賀表二首

十月為陽光啓寢明之運後天難老有嚴載夙之辰慶  
徹際蟠歡均抃舞恭惟皇帝陛下體堯神聖承禹儉勤  
接泰元授筭之期周流甲子過邠鄆卜年之數度越春  
秋時當虹電之祥允致天人之助臣列班紫橐今牧洪  
都鏡錄千秋莫繼唐臣之筆觴稱萬壽載馳漢殿之誠  
神告昌期久啓燕謀之慶祥開良月風流虹渚之光於  
昭誕節之臨不顯歡聲之洽恭惟皇帝陛下溥將受命祇

懼治民德邁五三混華夷而共貫統傳億萬與日月以  
齊輝屬茲載夙之辰益衍方增之福并包所暨鼓舞惟  
均臣職在祝釐誠存歸美照臨有赫遙傾就日之心覆  
禱無窮請祝後天之算

賀皇帝御正殿表

奄四海以為君大膺天命朝諸侯而當宁盡酌民言渙  
汗一頒羣心允協恭惟皇帝陛下閔端孝治注意聖傳  
入翼室以宅中親承末命眡治朝而聽政宜正大昕聳

內外之觀瞻協神人之屬望臣欣聞盛禮病卧遐方雖在江湖猶不違於咫尺遠瞻天日如親睹於清明

賀皇太后御正殿表

位同太極莫如母道之尊禮有時宜共濟君臨之業鋪張新政增益舊聞恭惟皇太后陛下德備洽陽祥分沙麓成功內治嗣任如之徽音聽政外朝接曹高之懿範已正簾帷之御益安內外之心中外無譁神靈克享臣叨恩過分已病祝釐親見微身遇照臨之日月喜同品

物入動散之風雷

壽慶節賀表

統接歲千先啓東朝之奉陰生夏五又開南極之祥凡  
在照臨悲深抃舞恭惟壽明皇太后陛下御今九有稽  
古二南正母道于宮中實關人紀扶日輪于天下綽有  
聖功慶瑞節之開先永徽音而嗣古臣職雖補外心實  
指南前殿玉卮想一時之歡洽後天寶歷占萬載之延  
洪



日舒南陸麗天占離位之重星拱東朝彌月闡坤珍之  
瑞慈闈光啓寰宇歡騰恭惟皇太后陛下賢邁虞嬪行  
齊周妣遵燕謀而啓佑翊駿命以照臨子育羣生上體  
高穹之眷母儀四海中存太極之神繼元佑之徽音舉  
長寧之彝典茂膺純嘏益衍丕基華封祝聖人共喜堯  
民之擊壤皇帝奉太后未誇唐殿之稱觴臣身繫賦輿  
心馳象闕薰風入五絃之奏欣際阜財萬嶽傳萬歲之  
呼永祈介壽

謝朝辭內引奏宣賜表

久曠經帷已絕寵光之望乍違帝所不勝戀慕之心方  
反復以陳情忽便蕃而受賜一身莫報萬口稱恩臣竊以  
硯出端溪飾之寶匣馬來冀北被以錦韉器與幣以皆  
華若得香而益雅錫命雖存於舊比優賢不在於常才  
顧惟愚臣偶陪講席薦縻藥鼎乞歸不及於終篇峻陟  
松階進職已多於始望豈期新渥尚及陳人驟加券外  
之榮益重山表之愧茲蓋伏遇皇帝陛下曲成小物廣

播大鈞謂臣心乎愛君粗得詩書之訓念臣老而去國  
益施帷幄之恩舉隆典於濶疏駭羣心於觀聽臣雖髦矣  
自視歛然矍鑠服乘尚竭力駑駘之後飽溫薰淪更効  
忠翰墨之間

謝皇太后宣賜表

立朝無補適當衰晚之年歸里有期冒受便蕃之渥便  
殿當陳於愚計講帷偶及於終篇重申命以無嫌九殞  
身而莫報臣竊以易稱錫馬極為三接之榮史著賜金

謂賞六奇之計以至香來蕃國與夫茗出壑源器分御  
府之珍羅疊宮衣之雪有功則賞猶曰患多當去而留  
不幾冒受鼎來沓至恩重命輕茲蓋伏遇壽明皇太后  
陛下山立朝東天臨慈極功高與子接大統以持盈德  
在及人施餘恩於優老遂令異數猥及孤蹤臣拜命闕  
庭問程鄉井樂唐虞之化尚鼓舞於聖時歌任如之章  
知本原於母道

謝撰攀龍臺碑蒙賜表

臣某言伏奉恩勅緣撰攀龍臺碑文賜臣物四百段研  
精不優篆刻無術下帷闕蛟龍之學搦管慙鳳凰之思  
猥辱隆命俾圖先範戴天知跼仰大象而增遊述聖為  
言撫孤懷而自失寧足發揮一德揚推萬分述虞后之孝  
思談姬文之睿業而天情不匱帝造無涯式推愛敬之  
心用廣褒崇之惠披文相質本殊黃絹之詞頒賞計勞  
遂承紫泥之渥荷寵惟懼瞻恩載覩祇奉之日悚汗交  
馳無任慙載屏營之至謹附洛州奏事使具官臣奉表

陳謝以聞

寶謨閣直學士提舉佑神觀兼侍讀謝皇帝表  
晚景侵尋合歸休於里社聖恩廣大尚勸誦於經闡美  
名聯學士之班厚祿假內祠之寵分皆過甚力則難任  
伏念臣息偃窮年遭逢新政絲綸三接無非越次之官  
藥餌一年遂起乞骸之念夢寐已歸於江國姓名頻叫  
於天闕謂宜已照於容光何乃尚稽於從欲上儀曹之  
紱猶入侍於金華出真館之綸更峻陞於寶閣盛服侈

解衣之渥精鏐分帝錫之珍為老臣將去之榮舉近歲  
不行之典茲蓋伏遇皇帝陛下緝熙聖學振拔儒生知  
臣求退之意勤出於真實念臣在列之日淺姑使遲留  
加以不次之榮名寵以久虛之異數微生有幸末路增  
華而臣志氣索然頭顱如許集百憂於方寸脫萬死於  
毫釐馬戀軒之本心未敢釋露門之卷蟲負山之綿力  
終當掛神武之冠

寶謨閣直學士提舉佑神觀兼侍讀謝皇太后

表

學士通班忽陞華於峻職講闡勸誦尚竊康於真祠本  
求去而得遷將終辭而懼瀆勉從成命愧極愚衷伏念  
臣末路窮儒聖朝遺老學雖有志欲粗接於師承技本  
無他終不宜於用世荷造化不遺於微小致夤緣遂列於  
禁嚴賜環首列於諸儒再轉與聞於三禮執經進讀無  
補毫芒煮藥偷安難堪疾疚苦口願歸於田里窮年已  
迫於崦嵫豈期疏寶閣之名更使上金華之直茲蓋伏



遇皇太后陛下恩寧僭及器不備求坤德居中助堯舜  
之先務母儀型外躬任似之徽音成先朝三褻之功協  
聖嗣初年之政遂俾荒疎之學亦蒙塊圯之仁臣榮與  
憂并望非意及歸計已形於夢寐病軀益見於衰頹幸  
際風雲姑依光於日月恐填溝壑願終老於漁樵

明堂禮成賀皇帝表

色動房心禮既成於陽館恩均海宇德遂布於端門徇  
斯民遠罪之心廣真主推恩之意臣竊以國之祀典莫

重於親祠聖有統傳尤嚴於謹始當繼序不忘之日行  
合祛大享之儀熙事已竣一時創見恭惟皇帝陛下丕  
承累聖對越三靈志在守謙甫親於幾務事遵越紼益  
重於孝思璧琮奠而百志欽簫韶鳴而羣工肅情文兩  
稱上下交欣體祖宗不殺之仁普霑中外發天地好生  
之德下及昆蟲大號風行歡聲雷動臣奉祠嵩嶽留迹  
周南駿奔走而執豆籩阻躬陪於帝所觀會通而行典  
禮知上格於天心

明堂禮成賀皇太后表

禮嚴宗祀方講於威儀志在羣生旁流於沛澤凡有知  
識悉聳見聞臣竊以享于合宮時惟鉅典傳之累聖視  
彼郊丘當簾帷保佑之時正中外瞻觀之始恭惟皇太  
后陛下應時休運嗣古徽音末命導揚既親承於密議  
明裡修舉益增重於彌文遂敷雨露之恩徧及際蟠之  
廣臣無功聖世有位清廟虞瑞初班遠想總章之訪周  
仁大賚但榮象魏之觀

辭免除職與郡恩命表

引疾乞歸力布由衷之懇蒙恩錫命尚叨望外之榮此  
恩雖出於非常於分深知其不可若為躋地尚敢叩閤  
臣聞職名所以優賢非賢不授郡守期於布政無政奚  
觀昔嘗分千里之符固欲盡一朝之力寓直冠西清之  
首居中聯學士之班何者么微踰涯至此今而衰颯置  
散則宜豈應外界於專城況乃內連於異數或謂曲加  
於佚老其如非所以使能始待對於露門尚慙尸素當

掛冠於神武寧敢求多用是盡情庶幾從欲伏望皇帝  
陛下順行古道俯鑒愚衷察臣久廢朝參難受無功之  
賞念臣屢更繁劇本非避事之人無嫌反汗之難庶遂  
乞身之願

賀壽皇生曾嫡孫表

乾健坤承尊莫嚴於太極山輝海潤慶遂衍於重孫  
郎吏一傳羣心允愜恭惟至尊壽聖皇帝陛下功高協帝  
孝極尊親脫屣無為既得廣成之道降年有永孰占邛

鄔之期昭大德以裕後昆詒孫謀以燕翼子本支既茂  
爪隤益繁臣親見榮懷適將隆指鬱蔥望氣天一笑以  
可知熙洽逢辰嶽三呼而未已

賀皇帝生嫡孫表

運啓赤符丕闡重闡之慶歡騰朱邸有開冢嫡之祥輦  
固宗祊光輝圖牒恭惟皇帝陛下道傳面命治本躬行  
巍巍蕩蕩之功統接千歲繼繼承承之美史不一書於  
昭蕃衍之期申錫熾昌之應鼎來帝祉榮啓孫枝臣使

領熊湘心馳魏闕由一知萬與聞炎祚之隆以古揆今  
竊謂本朝之盛

賀皇孫降誕表

前星有耀肇新朱邸之祥景命誕膺首啓綠車之慶體  
關宗社樂極際蟠恭惟皇帝陛下勤儉刑于家邦忠厚  
及乎草木天錫靈長之羨預正元良躬行積累之仁莫  
名盛大國本繫無疆之望孫枝開有永之期兢兢震雷  
倏增崇於乂鬯詵詵螽羽佇蕃衍於雲仍臣近獲通班

遠聞盛事卜年卜世而過歷知兼茂於本支祝聖祝壽而多男更傳芳于瓜瓞

禮部侍郎謝皇帝表

賜遷外服已聯獻納之班再擢中臺又列寅清之佐薄分已慙於超躡大恩復至於便蕃退省其私無能為役伏念臣頃由閒館峻入禁途中朝無一日之班誤令持橐末學昧五兵之要遽使司戎史闡浪綴於編摩經幄濫巾於誦說所虞過分寧敢求多思昔伯夷舜命當勤



於夙夜是為宗伯周官首冠於夏秋職思兼治於神人  
親擢亦難於副貳若何俗骨亦玷清流茲蓋伏遇皇帝  
陛下踐累聖之基圖新一朝之文物謂六曹贊長雖並  
列於亞卿而三禮名官乃獨稱於華選欲講明於鉅典  
猶推擇於微臣輔尚書喉舌之官託祈父爪牙之助天  
光旁燭不間幽微人爵增榮若何稱塞臣敢不考三王  
之制參二載之書事為制曲為防豈但諛威儀之盛朝  
有著會有表又當明制度之嚴

禮部侍郎謝皇太后表

戎部空餐佐五兵而有媿秩宗清選典三禮以何能官  
聯雖似於遞遷士論實知其峻陟得踰所望感極難名  
伏念臣起自漁樵進陪表著初無學術論思禁路之間  
徒以樸忠扈從屬車之末告朔僅踰於七八拜恩已至  
於再三東史筆則未決是非輔聖學則徒知誦說日窘  
負薪之疾倚藥為生浪居持橐之聯取禾而食議定乞  
身之計慙無報國之功言未吐於忱情心已形於夢寐

任夙夜寅清之責當屬名儒兼神人上下之權實非冗  
職選用必求於人望叨踰豈但於身榮郵傳風行宸恩  
天覆茲蓋伏遇皇太后陛下體坤用六如晉接三知臣  
下勤勞已報二南之化當國家閒暇兼收一得之愚改  
弦聲鑾下之焦施色飾溝中之斷偶留餘韻終借末光  
臣敢不感此逢時心乎體國觀會通而行典禮體首出  
於飛龍志倣儻而精權竒願智專於老馬

兼侍讀謝表

禁路初陪未脫塵埃之舊經帷進讀遂親日月之光驟  
加躡等之榮莫徇循牆之意伏念臣世途九折門地一  
寒清白傳家始辛勤於簡冊倉皇就祿終汨沒於簿書  
歷四十餘年如夢寐之間置五三六經於齒牙之外不  
知老至矧以病纏聞帝王自古以來必資誦說若神聖  
其功莫大不假漸磨矧諸賢方盛於執經在孤陋豈容  
於分席忽傳除目殊覺驚心居論思獻納之班更令入  
侍近蠖濩蟪蛄之座矧乃前陳凡骨易仙榮懷增懼茲

蓋伏遇皇帝陛下事惟古訓聖不自居天縱清明熠熠  
不遺於燭火海涵浩渺涓涓猶取於潢流求學問必至  
於芻蕘任仔肩將示於德行遂令朽質得侍清光臣敢  
不溫習舊聞對揚新渥雖則稟資駑下未深明玉板之  
文亦須勵志討論庶不負金華之選

兼侍讀謝皇太后表

典武班行未見論思之益執經帷幄本無誦說之能驚異  
數之沓來撫微躬而增愧臣奮身塲屋脫迹山林初讀

父書早已失過庭之訓稍親師席久而非入室之科辛  
勤粗服於官常展轉偶逃於吏議領銅符而出守當風  
塵倣擾之時持玉節以觀風適邊徼陸梁之際亟受先  
皇之眷誤膺元帥之謀拜恩累玷於絲綸投老久安於香  
火忽被持荷之召俾列夏官曾何秉筆之長更兼史館  
又進邇英之讀益增儒者之榮退省其愚若為可稱茲  
蓋伏遇皇太后陛下功施社稷德協天人輔佐求賢始著  
坤元之厚簾帷決事已重離麗之明方輕視於崇高尚

曲成於造化深培聖學用及臣愚臣敢不博采多聞益  
溫舊習詠歌周雅體太似之徽音反復商書廣高宗之  
時敏

謝改知隆興府到任表

西蜀歸田甫踐粉榆之境南昌謀帥誤當樗櫟之材叫  
號本在於乞身微幸敢萌於易鎮已涓日吉始服官常  
伏念臣寒士得官初年有志念民生之不易吏貴循良  
際邊事之靡寧時當扞禦一意但安於死守萬分偶得

於生全初無排難之成謀粗有牧民之本意荆湖窮處  
身率戎昭漢水源頭手行荒政時造化有彌天之覆致  
馳驅無擇地之私此身已荅於負薪人望豈堪於作牧  
矧烈祖潛龍之郡古號名都賦唐人飛鷺之章人推勝  
境舊額尚存於督府大臣常至於出藩豈朝蹟之不更  
忽中權之誤寵茲蓋伏遇皇帝陛下日新萬善器使羣  
工謂人才各有所長不求全備知天下本無難事要在  
忠誠如臣已試於民庸或者頗諳於吏治處之江右擢



以帥垣臣敢不力疾効官齋心報國與民休息庶幾賡  
襦袴之歌禁吏貪殘其敢犯繭絲之戒

箋

皇帝即位賀太皇太后箋

母道三朝為社稷久長之慮孫枝四世承祖宗積累之  
基定議宮闈歸心海宇恭惟太皇太后陛下承堯運德  
授舜傳心昔求賢而審官輔成至治今正君而定國遠  
有宏規從古至今此事創見臣親逢鉅典伏讀訓詞應

地無疆仰坤順至剛之德後天難老應乾行不息之期  
皇帝即位賀太上皇后箋

歷數傳賢丕闡赤符之運宮闈定議共非黃屋之心歡動  
寰區事關宗社恭惟太上皇后殿下德承剛健性本靜  
專志在求賢內贊六年之治功成與子外安四海之心  
始既盡於憂勤久乃游於汗漫臣遠觀彤史孰儷皇家  
繼繼承承盡危微之親授原原本本知警戒之相成

皇帝即位賀皇太后箋

奕世傳心事益光於三聖正家有道慶遂集於重闈四  
轍迅郵一陶和氣恭惟皇太后殿下徽音詒遠厚德資  
生儼美重華力贊承堯之道問安慈福已成錫禹之功  
燕及神孫誕膺天命臣聳聞盛事遐想詒謨命出隆慈  
協億載萬年之計尊同長樂備九疇五福之榮

皇帝即位賀皇后箋

天命人謀統正傳於大寶陽剛陰相位首定於長秋端  
本一家視儀四海恭惟皇后殿下慶鍾王邸德配震宮

奉三朝之歡克循婦道刑二南之化宜正母儀於昭大  
號之揚咸仰徽音之嗣臣肅將使指遐想禮容觀詩及  
書復見塗莘之懿自內及外坐移江漢之風

賀皇后箋

奠位坤儀儼尊宸極累朝盛典萬國歡心臣伏以夏有  
塗山用能襲堯舜之盛周稱太姒所以嗣姜任之音必  
朝夕憂勤之心與夙夜警戒之道輔成聖治表正人倫  
恭惟皇后殿下天錫靜專性成慈儉冠四星之首於赫

母儀刑二南之風聿昭王化正名宮壺同體聖神臣獲  
覩彌文莫階庶列讀王言之播告知內治之修明

賀皇太后生玄嫡孫箋

三朝壽母彰甚盛於皇家五葉嫡孫實挺生於朱邸體  
關宗祏喜動宮闈恭惟壽聖皇太后殿下德順承堯謀  
參授舜迨九功之惟叙膺萬福以無疆節屆春祺方衍  
後天之算統傳正派肇開奕世之賢非惟曠古之未聞  
抑亦本朝之創見臣遠拘持節阻聽催班本本原原知

慶流之遠大繩繩繼繼仰內治之修明

賀壽成皇后生曾嫡孫箋

日月齊明成功與子天地並貺奕世生孫胄出神明國  
齊翼翼恭惟壽成皇后殿下化行彤史德紹徽音當慈  
皇孝理之時聿修內治及嗣聖心傳之際實啓睿謨上  
致養於東朝下流芳於朱邸雲仍未艾典冊有光臣迹  
在三湘歡同萬國閭端慶系已觀椒實之蕃基命皇家  
永保蘿圖之固

賀皇后生嫡孫箋

三聖相授家刑國以開祥五世其昌子生孫而有耀璿  
源正派玉葉重芳恭惟皇后殿下婦順三朝母儀四海  
陽剛陰相佐駿命以成功天施地生與螽斯而比德格  
螯螯衆多之應固丕丕遠大之基舟車所通室家相慶  
臣屬茲親見亶未前聞夏道方興知有塗山之助周年  
可卜願廣大姒之章





欽定四庫全書

昌谷集卷五

宋 曹彥約 撰

封事

應求言詔上封事

臣伏讀聖訓至再至三仰見陛下寅畏以奉天艱難以濟業不矜伐聰明不鄙薄愚賤博采旁求思有益於治道而後已臣待罪言語侍從之列職思其憂聖意之所未及猶當有以補報萬一矧惻怛求之可無一言以自

劾耶臣竊觀陛下嗣服之初未嘗有失德於天下而天下之共治者常有凜然不安之憂天下之論治者常有歉然不足之歎不可謂之小故也豈新政所當行者有未盡耶抑事變之方來者有難測耶將異議者好為紛紛而不足卹耶抑將疑其說之不合而思求以勝之耶明良精一之地兢業萬幾主德必欲其宣恩澤必欲其流乃方與賢士大夫爭辨於是非之際疑似於從違之末則致治之效無時而可望矣都俞之堂何嫌於吁咈

好謀之主何難乎銷印施行容有未盡事變容有難測  
異議者正所當卹而其說之不合者不足勝也臣不暇  
廣譬曲引以明前事之失亦不敢偷容取悅以媚世俗  
之好竊以為重裘可以禦寒自修可以止謗若國勢之  
所以未定與人情之所以未孚陛下諸臣皆足以應詔  
言之矣不復條列以紊天聽請即其易行者而徑言之  
庶幾其有補也陛下謹定省以事長樂開王社以篤天  
倫孝友之行宜足以取信於天下矣然而兄弟至親猶

誤於狂妄小人之手道路異說猶襲於尺布不縫之謠  
事關國體人皆以為難處矣臣猶以為易也守法者人  
臣之職也施恩者人主之柄也漢淮南厲王欲危社稷  
大臣張蒼馮敬等論如法文帝既赦其罪廢而勿王不  
幸而死即封其三子於故地以示私恩此往事之明驗  
本朝太宗皇帝之所已行也今若徇文帝緣情之義法  
太宗繼絕之意明示好惡無隙可指雖不止謗而謗乃  
息矣陛下招山東以復境土撫忠義以幸遺民混一之

機宜闡端於此矣然而跋扈之將肆凶殘於制閫授鉞  
之人持依違於兩端去留不常包藏未發事關國勢人  
以為難處矣臣猶以為易也戎虎牢之城鄭不得與晉  
爭杜大行之險楚不足以支漢用兵之道可以形格而  
勢禁不可以直致也江內者兩淮之腹心正軍者忠義  
之主宰有三萬之正軍然後可以制一萬之降卒有十  
萬之正軍然後可以制三萬之忠義今盱眙孤單江西  
關遠三衙渙散見謂脆懦若能徙江外之關額立江內

之重屯人衆而聚則有才可選軍歸其營則無券可擘  
可以省廩稍可以減般運使超石拔距之勇出其中而  
牛酒日至之聲聞于外然後經理淮壩振立威柄則犯  
上者翻為孝悌而狂狡者莫不率服矣陛下位置虎臣  
布列閫外峻陟驟用不拘常制宜有以得其人矣然而  
每一選用物論洶洶幸而無事則舉朝相賀不幸而敗  
事則舉朝歸怨事關國論人以為難處矣臣猶以為易  
也寇準之在北門則白溝不警矣張浚之在江左則淮

泐不震矣今大而帥守小而一州選用已定臣未敢輕  
議金陵虛席公論之所屬目合公論則朝廷奠枕拂公  
論則海內寒心筋力不逮者既不可以勝任望位未至  
者又不可以嘗試或已試而軍民不服或未試而公論  
不與豈惟臣獨憂之凡心乎國事者皆不免於過計矣  
臣以為人才不可以全求公論不可以力勝與其用輕  
虛淺迫之人不若用遲鈍木訥之士與其用掎克聚斂  
之才不若用寬裕溫柔之德其仁聲足以安百姓其器

宇足以壓人望氣類相感則寮屬可以任事清介相勉則道義可以相規用人如此則慙直者可以寢淮南之謀而儉約者可以罷子儀之樂矣陛下正旦視朝以求賢為急訪落親擢以靜退為首拔茅連茹以其彙征宜必以序而進矣而詔旨所頒或指為具文選召所及或慮其不廣事關國幹人以為難處矣臣猶以為易也求賢者人主之心也用賢者人主之實也仁宗之用執政或給札於天章而使之盡言真宗之待兩制或賜對於夜



分而與之議事故中外無不盡之情而田里無不安之俗今已至者列於朝而未能行其言未至者遲於外而未能必其進有言而未用則或者疑其沮於訐當言而未發則或者疑其局於懦日月逾邁功效蔑然循習如此其視前日未求賢之時何異今若考其言而信其所學用其長而棄其所短則能言者無面從有懷者無腹誅矣陛下求言之心已形於御筆而播告之旨復發於手詔勤勤懇懇惟恐不逮宜有以獲其利矣然而外議

致疑莫能解釋以為明言文武似或止於衣冠而泛言  
小大恐不及於韋布事關國脈人以為難處矣臣猶以  
為易也敕令之已行者猶必曰該說恐有未盡詔旨之  
已誤者猶必曰前降更不施行況已謂小大之臣則凡  
率土之濱者皆得以盡言矣引而伸之特在於一命令  
之間耳孝宗皇帝即位於六月之丙子而求言降詔已  
見於是月之甲申至八月壬午而進士上書者已補官  
矣九月癸丑而布衣獻言者已詔赴都堂矣今若明降

指揮發揚詔旨之意精選近臣考定可承之策舉而行之不間於樸直旌而賞之首及於疎賤在上者固有逸言而在下者民用丕變矣凡數者舉天下皆疑其難而臣獨以易言之臣非輕此數者而忽之也懼陛下疑言者之過而以為不可行也懼言者測陛下之意而以為必不行也果其不戾於聖賢不拂於典故可以寬聖慮可以繫人心若何其不於簡易求之而使上下之情扞格而至於此也然臣猶有獻焉立天下之事者貴乎斷

處天下之事者貴乎謙慮天下之事者貴乎詳行天下之事者貴乎速肇十有二州舜之功也汝平水土乃歸之於禹薄伐玁狁吉甫之功也侯誰在矣乃歸之張仲謂天下可以一人治也不可以一人智力專也丘山積卑而為高江河合水而為大君不自有而歸之於其臣臣不自有而歸之於同列所謂謀及乃心者必謀及於卿士謀及卿士者必謀及於庶人然後人心悅服怨讟不生今天下之事雖出於獨斷而衆多之論豈無偶合

程度者若因某人之說而建某利用某人之策而除某害造命於上者不失於斷而推功於下者益示其謙此則舜禹之用心也故曰立天下之事者貴乎斷而處天下之事者貴乎謙武王克商未及下車而封黃帝之後於薊孔子為政甫及七日而肆少正卯於市謂盛德不可不速祀而姦宄不可不速去也臨淵而羨魚者不若結網之為便冠冑而枕轡者不若彎弓之為健賞罰之所當行命令之所當出聞一善則若決江河去一惡則

迅如震電使責望於上者無所憤怒而玩狎於下者不至苟免此則武王孔子之用心也故曰處天下之事者貴乎詳而行天下之事者貴乎速今天下之大害者莫急於賊吏羣臣既已言之而陛下既已聞之矣竊意陛下將以行其言也而出令未暇也天下之大害者又莫急於苞苴羣臣亦已言之而陛下亦已聞之矣竊意陛下亦將以行其言也而出令未暇也議者不深察朝廷之意即謂厭薄其說而不用臣知其不然也陛下無意

於求賢則不發求賢之詔矣無意於求言則不發求言之詔矣賊吏之不可使治民苞苴之不可以立國夫人而能言之其在聖明豈不知此何忍迂緩隱忍以至今日哉行臺諫之所已言用轉對之所通論求賊吏之昭灼者而深治之雖有功勿貸察苞苴之肆行者而遠斥之雖親賢勿釋立此之斷處此之謙慮此之詳行此之決則臣猶以為易也觸類而長舉天下無不可為之事矣然則天下之事終於易而已耶禹曰后克艱厥后臣

克艱厥臣孔子曰為君難為臣不易聖人之言有異於臣之說者何也蓋難於保治者君臣之心而易於行事者君臣之政也有心於慮治則於理為難有政以為治則於事為易上天有靡常之命祖宗立不拔之基以朽索而馭馬以弱水而載舟若何而謂之易從諫則能如流改過則能不吝賞善罰惡惟恐其不及舉直錯枉惟恐其不速若何而謂之難臣之所謂易者特在於舍己以從人耳慮治之所以難羣臣既已言之為治之所以



易臣遂得以進其說雖二事也其實一理也古者天子即位三卿進策始之以除患則為福次之以先慮患謂之豫終之以禍與福鄰莫知其門豫哉豫哉萬民望之以為禍者福之所倚福者禍之所伏言福而不言禍非所以愛其君而憂其國也陛下勿謂天災之未見而以為安也勿謂外難之未作而以為治也天災未見楚莊王以為憂外難未作晉范變以為慮董仲舒所謂出災害以譴告出怪異以警懼者推廣此意也賈誼所謂即

不幸有方二三十里之旱卒然邊境有急者端本此說也臣壯時粗有志時事今年六十有九多病少安去死無幾心志既已不强議論又復淺陋自量筋力無益斯世感陛下求言之意而羣臣又已建責難之意敢復求其所以易者以獻望陛下行之而已非敢反常說而背古道也惟陛下與大臣圖之臣不勝惓惓

應求言詔書上封事

臣伏讀正月二十三日詔書求言於搢紳之彥芻蕘之

微以為厥今百度未釐三邊未靖人才乏而未究搜揚  
之術民力困而未明惠養之方救此弊端寧無良策乃  
若箴規主失指摘官邪人所難言朕皆樂聽臣讀至此  
未嘗不聳動太息識陛下望治之切也竊惟陛下嗣登  
大寶十有五年內無宮室苑囿之美外無弋獵狗馬之  
好以此為治宜將上咸五帝下登三王然而奸臣所以  
怙勢公論所以靡容屏蔽聰明排斥忠直致使更化再  
踰於月律求言罕見於奏封有如詔書所云者則為治

之道豈固有所扞格而不可至哉祖宗設求言之法其  
於人主之一身審矣臺諫之職所以議論是非給舍之  
官所以糾駁章奏侍從之有已見則論思者可以無廢  
職史官之有直前奏事則記注者可以無隱情至於講  
讀之侍燕閒兩制之備顧問朝殿之有輪對暇日之進  
故事莫不啟沃帝心助成聖學下至於主兵官之有倚  
仗子樞屬之有承旨公事外任官之有朝見朝辭草茅  
韋布之有封章亦皆互相發明無有壅蔽朝思夕惟可

因否革與二三大臣謀謨而力行之造命於上者謂之  
萬幾著見於下者謂之百度順此而行何治之不致陞  
下在潛邸時尊儒重道講論經義無有厭敷龍飛之初  
每欲延見舊學咨詢治道收召名儒虛懷聽納當此之  
時天下仰望謂高宗孝宗之治指日可見自慶元改元  
之後當宁恭默大臣奏事不聞有所折衷小臣奏事不  
聞有所訓飭士大夫絕念謂陛下無意於政矣今者大  
明公道詔求直言治病於已病之後改過於悔過之時

是宜明哲未臨姦蠹覲消然而外郡章奏累月不下軍機急速踰月不行省部之事未免稽留朝堂之務失於叢脞內而京局外而州縣奉行不虔絕意治功置郵傳命稽違程式無前日專權之患而有上下不任責之憂此則勉強之道未行而瞑眩之藥未進也木本無蠹根不茂則蠹有時而生人本無疾氣不盛則疾有時而作人主於剛健之時明君人之道審為政之理則奸邪無自而執柄近習無自而用事惟夫翫時愒日不以稼穡

艱難為憂居安忘危不以祖宗積累為念則賢人君子  
必皆遂其難進之心儉人佞夫復有以堅其患失之意  
利害莫從而上達福威因得以下移百度未釐當必由  
此今不開公正之門鑒偏信之弊而獨拘拘譏謏守常  
執固以簿書為實政以歲月為無用此何時也而固為  
是不切之政耶陛下閱百度之未釐則必以持守為難  
以逸豫為戒大臣造膝必與之反覆詳盡羣下進見必  
為之謙虛接納至於軍國庶政亦以委任責成等計見

效正不在於懲沸而吹鑿也臣聞兵所以撥亂亦所以起亂因亂而撥之者其兵直無亂而起之者其兵曲古人之用兵一皆為民而已彼其困於鋒鏑之慘弊於轉餉之勞父子不得以相見兄弟妻子不得以相保聞撥亂之聲則必欣欣喜色而相告此簞食壺漿之禮所以至而奚為後我之言所以發也若其耕田鑿井以為樂仰事俯育以為安身不履行陣老不見兵革聞起亂之聲則必疾首蹙額而相告此豈言語之所能詔告而刑



罰之所能驅迫哉是故聖王重兵生民厭兵老師宿儒  
不敢談兵武夫悍將不敢佳兵順乎天而應乎人如此  
而已彼首兵議者何所見而為之耶謂國論已定歟則  
朝行而夕改矣謂國勢已振歟則兵冗而將驕矣謂國  
用已備歟則帑無十年之財廩無一年之蓄謂敵人已  
弱歟則起兵百萬而空虛之證不見開邊三年而中原  
之豪傑未歸兵已連而不解和已議而難成遂致貽憂  
君父流毒百姓三邊之未靖將何術之可救也疾痛未

深可以導引轉禍患未成可以言語感令起兵釁而失地利求和議而竭國力誅首謀不足以厭其心頻遣使不足以得其意事勢急矣非可以常說解也主國是者貴持重決大議者尚操畧夫恃強則欲戰畏弱則請盟寒氣至而厲甲兵煖氣效而弛邊備則庸人妄夫皆足以有為何貴乎豪傑之士應酬萬變而不窮也敵雖剽勁而兵機變詐乃其素講非如中國之人習熟禮義遇有緩急取兵事而徐議之耳彼其大舉於丙寅以威聲

脅我疲敝於丁卯以和議歟我察其情實豈不以歲幣  
為利惟其所問輒應所求輒得以我為易與而直以無  
道行之若又處之不得其宜行之不得其道必將違其  
本心縱貪饕之欲而未已也夫語殺人者未必殺人以  
其謀之淺也然而人或不畏則怒而殺人畏之已甚則  
逞而殺人殺不殺在彼備不備在我實利實害不繫乎  
畏不畏也勿謂求之太過可以得其心拒之太峻無以  
制其命彼誠欲來非可以盟誓沮彼誠不來非可以言

語化其和也則不來為正兵來為奇兵其不和也反是此靖康之和立變於頃刻之間紹興之和反覆於數年之後事有商鑒不可泯沒則兵之用否不在於急和明矣陛下念三邊之未靖莫若遲留小使督責邊備內為不必和之實外不沒可和之名使之不測事端君臣相怨假以數月便見真偽設復大舉則其民固已怨矣欲進而此已戒嚴欲退而彼有叛兵辛巳之勝可復見於今日也人才之未盡非搜揚之所能及也昔者堯舜繼

軌元愷至湯武革命伊呂耦有如是之時則必有如是  
之用不借於異代久矣以賢馭能則人才衆以能馭賢  
則人才寡非衆寡有時而不同亦進退有時而消長也  
是故才滿天下真才不百一苟其有所抱負思欲自効  
於一世則必居易以俟時藏器而後動上之人不思有  
以善用之喜材術而鄙禮義重奔競而輕恬退則識時  
之士必有相攜持而去者矣禮不重無以致純儒爵不  
吝無以慰志士忠佞並進則忠者退賢不肖混淆則賢

者羞此當饋所以無益於興嗟而臨朝者有時而嘆息也十五年來士大夫之心術壞矣上焉者不愛其身以言語得罪或削籍而遠屏或臥家而待盡次焉者偷生仰祿以職業自見或諄諄於田里或切切於簿書是皆中人以上有所持守為時奮發可以倚仗其他則出入權門假借聲勢苟不至扇揚凶釁撰造釁端卑君而尊臣殘下而慢上不過貪位慕祿趨事赴功當大明旁燭之時各安分守亦足以蒞被使令未至甚害惟是庶恥

道喪風俗不美謁見者以伺候為常致書者以畫一為重隔越初任便求堂除鄙薄外庸躡進朝路致使涖職者無著效居官者無固志以州縣為假塗以表著為捷徑苟不反其道而用之正恐廉靖之士耿介之人入山惟恐不深避世惟恐不速矣近歲朝士補外終更者少貴要起廢驟進者多選人入朝不數年可以除節京官外任率十年不可以得郡矧今邊陲多事士大夫宣力暴露之賞不可以望御帶知閣之厚扞禦之秩不可以

比權務茶場之多正當比量重輕斟酌緩急久任者却與內徙再任者更與優遷使被堅執銳者無怨辭貪進嗜利者無倖位則人才不乏矣抑又有可言者古人於一世人物要必盡其才而用之反覆謀議惟恐其不熟默觀審察惟恐其不稱聽其言而信其行觀所由而察所安故能任之以事而無不成責之失職而無敢怨近日之事則有甚不然者宣威之臣賦上明命用舍利害所繫非細今或給以諭民却使撫兵始不知謀終使任



事欲加之罪其能無辭將帥之臣人命所恃兵將相知  
猶恐不齊今乃擢為郡守本無尺籍分撥他屯驟使臨  
陣欲責之效其何能必甚至身為執政不與廟謨並列  
樞府不知兵事朝廷用人一至于此雖俊傑未免苟且  
歲月以公府為傳舍以伴食為保身不然則有高蹈隱  
跡者耳陛下念人才乏而未究搜揚之術莫若均內外  
之任制遲速之法驟用恬退屏斥僥倖至於廊廟之任  
間外之寄事大體重不輕所予則人才皆至矣人君以

天為心以民為體斬殺不時不可以為孝言動非禮不可以為仁中興惠養九十年兼愛南北豈不知大讎未報正統未明為民受屈循至今日自兵興以來百姓之失業者不可勝計也曩時農夫令應募而荷戈矣曩時壯丁今死戰而暴骨矣大江以北莽為戰場淮襄關外半為丘區人煙稀少十無一二而米斗踴貴其值數千秋熟尚遠人情可慮兵之害民如此其酷也邊民喜亂失其良心或假託忠義肆為盜賊或結集鄉閭侵擾對

境居南界者以北界為怨敵居北界者視南界為仇讎  
剽及牛馬掠及婦女邊臣坐視不敢孰何要功生事者  
又欲作戰勝申奏僥倖推賞引惹邊釁屠戮平民無大  
軍可以迎敵無城郭可以禦侮展轉退保莫有限齊江  
北之民何所告訴束擔維舟日謀竄逸廢生生之具失  
耕農之業加之調發不常和糴方急已去者流為盜賊  
未去者苦於飛輓如此不已亦恐召釁稔禍不特北騎  
之可畏也既不能兼愛南北又無以感動中原復古本

意相去愈遠古人征討叛虐兵不血刃爭奪城邑市不改廛所謂師出以律否臧亦凶而況和戰者朝廷之微權整暇者邊臣之守職無事則橐弓卧矢敵人開戶有事則整兵而相向先鼓而後行事至而戰不從中制至於和戰大議事關國體若使勢不容已決意用兵必須大啟元戎弔民伐罪行一不義皆所不為若欲復尋舊盟尤當邊鄙不聳何至魚肉生民背天理而違古道使斯民至於此極也昔者河南之民被祖宗德澤不忍使

其子弟終於左袵父詔兄語朝思夕念望恢復之期念  
須臾無死則以中國之仁厚有以勝其慘刻中國之禮  
義有以別其放蕩也是以臨邊而語則自謂漢民交鋒  
而戰則常主倒戈每敵有長驅之心則未嘗無後顧之  
患若使結怨境上不能息肩中原遺黎自為勦敵對境  
之間岌岌乎不可以朝夕矣是故不安河北不足以服  
河南不服河南不足以制強敵陛下念力困而未明惠  
養之方則必明詔大臣講求邊政博詢羣臣選求邊吏

以版築儲峙為急務以誅亂禁暴為初政屯大軍以防  
姦民明黜陟以戢姦吏則民力少蘇矣百度之未釐三  
邊之未靖人才之所以乏民力之所以困臣固畧言之  
矣至於所謂箴規主失指摘官邪臣雖不才親逢求賢  
之主豈敢無說以處此也求言者治之形也用言者治  
之脈也漢光武建武詔書第五倫知其聖主唐德宗奉  
天詔書溜青軍士為之泣下言語感人其效如此本朝  
徽宗欽宗用之宜足以收召和氣而諄復昭回曾不及

事然後知宿患積弊根盤節錯利刃敏手猶恐不及是  
必審造命者如救頭去害政者如決癰坐便殿如受國  
書對羣臣如遇大敵此心所存對越上帝及其見於行  
事特其緒餘播於詔告特其發見有雍容和緩之意無  
急遽淺迫之謀如日用飲食不改常度如深居簡出不  
啟外侮此古之聖賢所以於穆而不已獨立而不懼也  
臣在遠方不識事宜但聞攬權之初威聲震赫朝廷不  
及知禁近不得與竄殛大臣歸過兵釁驟賞偏將峻及

庶車事出一時邈無前比然而人心未駭士論未詳皆謂改弦易轍必將取前日弊政而一洗之既而屢遣小使不少暇逸屢詔集議不立成筭邊陲之間易肆欺侮朝廷之上茫無執持事叢於更化之前而效未著於更化之後發威王之憤不足以擊魏衛赫文王之怒不足以遏徂莒則是規撫未定議論不一後之視今猶今之視昔也人徒見春事已深羽書稍緩苟寬目前便謂奠枕不知水潦一去秋風便高和議苟成敵情難測設使



誅求未已干戈復尋敗軍之將不保其復勇棄甲之軍  
不保其不潰糧運不保其能繼器械不保其適用廟堂  
之上將何說以濟也始謂權臣專制使執政之臣不得  
與議今議已與矣比前日何如也始謂權臣撓政使宣  
威之臣不得行法今法得行矣比前日何如也債帥之  
當易者幾處虛籍之當汰者幾許官吏之任責者幾人  
新政之望效者幾事長策急務未見毫末而簿書期會  
益以弛緩陛下有罪已之心至使天下箴規主失行綜

核之政又欲使天下指摘官邪不知人主用人一失其柄則箴規主失尚可逃譴指摘官邪其罪反大甚而臺諫給舍繫天下之公議顧乃朋邪結託為執政之私人漸不可長至有竊天下威福而不敢問者拔本塞源非一朝之故也古人以議執政為美談故政成而人頌其德後世以議執政為獲戾故政弊而人指其過祖宗盛時成憲具在文彥博之權方重唐介數其罪而不疑韓琦之勢方炎王陶攻其短而不避法家拂士君子之良師

也危言激論朝家之藥石也苟使大臣當國皆得以言  
其非則過小而易悔事近而易復有策免而無誅貶有  
待罪而無貶斥手足腹心之喻復見而徵招角招之樂  
作矣浸失本意此事未久大臣當軸惴惴然恐天下議  
已鉗制言路頤指給舍甚至假制誥以導私意因批答  
以報私恩推頌功勳極于元聖討論典故不由舊章一  
旦聖鑒所臨與衆共棄然後救數其罪派別其姦人人  
得以肆言事事得以詳論主失官邪莫甚於此陛下誠

厭習俗胡不取祖宗之法而施行之選用臺諫必使百官雜舉不使大臣干預其間斷自聖裁惟意所欲至於講讀之官可以非時見內宿之官可以夜分召或賜坐於燕閒或前席於宣室下民之問詢及芻蕘邇言之察不間疎遠則主失官邪永散霜釋矣臣誠知陛下所謂官邪不止乎此竊以為事勢方急非卑官小吏之所暇問也又況立法者在朝廷行法者不在天下一時之所立萬世之所行皆朝廷也烏有朝廷壞法歸罪於天下

而更立法以勝之此不公之甚也是故薦舉之有請求  
非薦舉之法也請求遍天下而謂薦舉之法當變誰之  
罪也官吏之有權攝非官吏之法也權攝遍天下而謂  
官吏之法當變誰之罪也押綱隸州郡而州郡不得專  
廂軍屬州郡而州郡不得使以至銓試之有代筆太學  
生之有詭名舍法之有異恩銓法之有堂帖是豈遠方  
寒士之所得為哉今不必純法上古求過於祖宗之時  
但只如紹興乾道淳熙間上下相維亦足以致治此在

陛下宵衣旰食勤勤懇懇不以去權臣為成功不以和我為得計坐薪嘗膽日與羣臣商榷求其所未至勉其所當行庶乎其可矣不然則日復一日月復一月內無善政外有強讎坐享太平又不得如今日也昔趙普戒太宗曰邪諂之輩蒙蔽睿聰非次興兵出于偏聽太宗無是事也蘇轍戒仁宗曰歌舞飲酒歡樂失節坐朝不聞咨謀便殿無所顧問仁宗無是事也忠直之士自古所同誠實愛君不知其罪仰惟陛下求言之切臣不敢

不盡其愚惟陛下赦其僭幸甚



